























no. 4

L'AVTHORITE  
ROYALLE EN  
SON DEGRÉ.

Case

F

39

.326

161524

THE NEWBERRY  
LIBRARY

C'Est en ce temps, plus qu'en autre fois, son passée, qu'il me semble à propos de faire entendre à tous les peuples, combien Auguste est la Majesté des Roys : & de quel prix est leur autorité. En ce temps (dis-je) que plusieurs, comme ayans pris nouvelles forces de la foible minorité de nostre Prince, se font illicitemēt des voyes, à la pleine liberté qu'ils se font de long temps proposée : & que par leurs escrits ils tendent d'affoiblir les principales colonnes de la puissance Royale, pour en porter les forces à des Princes estrangers, sans redouter le hazard de conduire les Peuples aux confusions d'une malheureuse Anarchie : ausquelles il semble desia beaucoup de particuliers courages se transporter, tāt par les mauuais exemples de ceux dont ils sont obligez de regarder les actions, que par les caressants desirs de la liberté, naturellement enseignee à toute creature.

En ce temps, que la recognoissance des debvoirs & subiections, familièrement introduites dans toutes les maisons, les mœurs & les enseignemens de nos peres sont veuës si furieusement agitees de diuerses interpretations, que chacun se peut sentir en doubte de ce qu'il doit à son Prince. Et iusques là,

que des plus familiers de ceux qui touchent de bien pres le tymon de l'Empire, leur presentent & font estimer des liures, qui sous l'excellent tiltre de l'Authorité Royale, ne leur donnēt autres preceptes, que de debilter leurs plus iustes & principales forces, ses puissans corps de leur redoutable Iustice. Et cela, par des conseils de plenitude de puissance dont la raison soit le seul commandement, & l'imperieuse volonte. De soubmettre bien bas les Majestez sacrees de nos Roys aux Princes, qui autrefois souloiet prendre d'eux, leur naissance & leur estre. Et de donner toute liberte, de commander en orgueil & vanite, à ceux qui ne doiuent estre cogneus que par le renom d'humilite & tres-sainte vie.

Je deplore bien fort l'aveuglement grossier de nostre miserable France, où les plus clair-voyans se laissent aborder par des personnes si temeraires de leur porter des conseils inhumains, qui leur persuadent, comme à des malades de forcenerie, de se ronger les bras & principaux membres, desquels seuls ils tirent le secours de leur vie. Et cōme renonçans à la douce liberte que les petits oyseaux ne voudroient pas changer à la plus delicieuse nourriture qui leur est apprestee,



sousmettre ces tant illustres Majestez, à l'imperieux ioug de personnes mediocres, qui viennent aux dignitez sans auoir appris à commander.

C'est vn infidelle desseing, de porter les esprits des grands à vne dominatiō si iniuste, que de par soy elle se puisse destruire, & dont les Conseillers mesmes prennent souuent les trop specieux subiects de persuader aux peuples d'en secouër le ioug.

C'est vn aussi infidele Conseil, d'induire son maistre à deffaire ses principales forces, & presenter son col à vne iniuste seruitude.

Mon ame composee d'une sincere affection & fidelité parfaite, ne pouuant souffrir les artificiels problemes de telles persuasiōs, ny les ignorantes conceptions de ceux qui les voudroient couvrir d'excuses, pousser ardemment ma plume à expliquer plus auant la vertueuse energie de cet excellent tiltre de la Royalle autorité.

Je commenceray donc au principe des choses, en disant, que tout ainsi que Dieu ayant cree ce qui est en la nature pour l'usage de l'homme, il luy en auoit mis le pouuoir en la main pour en disposer à son plaisir. Que puis apres multiplié en infinitudes de grāds nombres, chacun des Peres estoit le Monar-

que de sa famille, sous les commandemens duquel chascun particulier faisoit son exercice. Ainsi de toutes les ames créées dedans le Ciel & çà bas, le Dieu vivant s'estoit réservé le souverain Empire pour conduire tout par l'ordonnance de sa Justice, sous les loix de l'amour, crainte & obéissance : par lesquelles il a voulu nos actions estre réglées; abandonnant le surplus à la liberté de nos appetits, sans autre subiection ny contrainte des hommes.

Et d'autant qu'il se remarque dedans la conduite des Peuples, depuis rangez en diverses terres, sous les gouvernemens de diuers Princes, vne telle variété & difference de loix & de façons de viure, qu'il est du tout impossible d'en tirer vne certaine demonstration, sur laquelle on puisse fonder vne reigle generale de la iuste autorité des Roys, & de buoir de leurs subjects : Je me reduiray à la plus iustement constituée, qui est celle que Dieu ordonna sur son Peuple.

Car qui voudroit fonder l'autorité de nos Roys sur l'exemple de ceux, qui seulement establis par les hommes, se sont fait obéir par la seule force de leurs commandemens, on y trouueroit tant de tyranniques gouvernemens, de cruelles inhumanitez,

de tragiques souleuemens de peuples, & de meurtres des Princes, mesmes dedans l'Empire, que bien que toute puissance viene de Dieu, comme n'appartenant à personne de commander que de par luy. On a veu tres-souuent les subjects pressezz d'un ioug trop tyrannique, se reuolter, par vne opinion de n'estre reduits que par la force, à telle seruitude: sans y considerer la permission diuine.

Je sçay bien qu'on peut dire, que comme il n'y a si belle medale qui n'ayt son difforme reuers, ny rien de fascheux icy bas qui n'ayt son contraire: Que la seruitude à laquelle l'homme s'est reduit par le peché sous la puissance du diable, a esté par ordonnance diuine, seruant de reuers à la douce liberté de sa premiere innocence; Que Cham fut condamné du Seigneur à la seruitude de ses freres: ainsi que le ioug se voyant imposé par le vouloir de Dieu, on peut dire toutes les Monarchies en auoir esté de tout temps establies.

Mais les vnes s'estans commencees par permission diuine, & pour punition des peuples deuoyez: Et les autres de constitution expresse de Dieu, pressé des importunes prieres de son Peuple: On peut se seruir de l'exemple du premier, comme del'histoire



des hommes: & de l'autre, comme de la bafte & fondement des Ordonnances du fouverain maiftre & Createur, des hommes & des Loix. Et croire certainement les conditions qu'il a appofees au gouuernement de fon peuple, tant pour ce qui regarde le deuoir des Roys enuers luy, que ce qui concerne leurs droicts & puiffances fur leurs fujets, eftre de constitution diuine, & de neceffaire obferuation entre les hommes.

Ie ne parleray donc point de Nemrot ce puiffant Roy de Babylone, petit fils de Noé, qui premier dans toute la terre, s'eftant eftably Roy fur les hōmes, & oubliant les graces de n'agueres efpanduës du Ciel fur la famille de fon pere, commença auffi la premiere reuolte contre Dieu mefme.

Ie ne diray non plus des Pharaons ces grands Souldans d'Egypte, ennemis du Seigneur: ny de ceux qui habitoient la terre promise au faint Pere Abraham, dont la memoire odieufe pour l'abomination de leurs crimes, fe doit effacer à iamais: ny de la Monarchie des Affyriens, dont Ninus le cruel vainqueur de l'Asie ietta les premiers fonde mens, fur lesquels Semiramis fon impudique femme ayant inhumainement bafsty aux despens de fa vie, l'eftabliffement de fon  
trofne



trofne, elle en dépouilla par vn long temps son propre fils: ny d'vn Nabuchodonosor, exēple tragique de toute Idolatrie; ny d'vn Astiages, cruel bourreau de son enfant, ny de Cyrus son successeur si alteré de sang humain, que sa teste & son sang, au dernier de ses iours luy furent pour reproche: ny des Antioches & Seleuches Roys de Syrie, exēples prodigieux de toute inhumanité: ny des Ptolomees & Alexandres infideles tyrans del'Egypte; ny des cruels Phalarys, Denys, Nicocreon, ou autres Roys de la Grece, qui au milieu des belles Loix & florissantes reigles de police, ont vsé de tant & tant de tyrannies: ny des premiers Roys de Rome, dōt le commencement fut estably par fratricides, & suiuy de tant de deplorables prescriptions & meurtres, ny des premiers Empe- reurs, qui viuans sous les loix Payennes, se sont quasi tous tuez & assassinéz l'vn l'autre; ny mesme de nos Roys de la premiere race, qui retenans encor de la cruelle barbarie des Sycambres & Scytes, ont plus perpetré de meurtres abominables, qu'il n'en a depuis esté commis dedans toute la France.

Iene veux point (dis-je) rapporter pour exē- ples de constitution diuine, ces Roys dont la vie prodigieuse & sanglante, porte les

marques de telle abomination, que Dieu les appelle les Roys des gens, & non pas de son Peuple.

Mais j'auray pour entree le saint Pere Abraham, dont la bonté sans reproche excelloit les perfections de tous ceux de son tēps, lequel Dieu retirant d'entre les abominations de Caldee, il le conduit en la terre de Canaan, la plus fertile en fruiçts de toutes celles du monde : Il fait pacte avec luy de combler l'vniuers de la semence de ses enfans, & de perpetuer leur regne à iamais dedans l'Eternité.

Ceste semence s'estant multipliee en plus grand nombre d'hommes que le sable de la mer, & que les estoilles du firmament : il en demeure luy seul Roy, Monarque & conducteur, qui les retire de la seruitude d'Egypte, les guide sans souffrir necessité par les deserts d'Arabie, où tous les Roys ne les eussent peu garentir d'une mort famelique : & les rend (sous son regne paisible) vainqueurs & triomphans possesseurs de ceste terre de si long temps promise ; où ayans esté quelque tēps gouvernez par ses Magistrats sous les loix de ses saintes Ordonnances qu'il prononçoit bouche à bouche à ses Iuges, Sacrificateurs, & ses Prophetes, pour les faire

observer à son Peuple. En fin ses mesmes Officiers abusans sordidement de leurs diuines charges , se rendirent en telle haine & tel mespris enuers ces peuples , que las de supporter les iniquitez de leur gouuernement , ( bien qu'ils fussent choisis de Dieu ) d'une voix importune & pressante ils émeurent le Seigneur à leur constituer vn Roy, qu'ils demandoient auoir comme les autres peuples.

Le Seigneur qui pouuoit ( en estendant vn seul chastiment de sa Iustice souueraine sur la teste de ses officiers ) donner exemple de la punition de leurs fautes à toute la posterité : & de ce bras vengeur , contenter les iustes plaintes de ses peuples , sans leur imposer la seruitude des autres nations , s'accommode à leurs cris & transmet en la personne d'un homme ce commandement familier & bening, qu'il s'estoit iusques là reserué dessus eux. Il leur propose par la bouche de Samuël son Prophete, les droicts souuerains & puissances qu'il dōne à ce Roy, si absoluës sur eux qu'il ne leur est loisible de luy desobeyr en aucune sorte : & luy establit des loix particulieres de son obeyssance, & del'amour & iustice dont il luy commande d'vser enuers ses subiects, reseruant les chastimens des con-



trauensions de ce Monarque, & correction de ses fautes au seul tribunal de sa iustice diuine, sans l'affuiettir à aucune puissance humaine. Et voyla l'ordre par lequel l'esprit de Dieu a conduit l'establissement des Roys dessus son peuple.

Je ne diray donc point comme les ennemis de la puissance de nos Roys, qu'ils sont establis pour fouler souuerainemēt les Loix, & regner iniustement sur leurs peuples: Et pour assujettir leur couronne au S. Pere, duquel ils ne sont subjets ny tributaires: Mais comme subrogez par le Seigneur aux fonctions souueraines qu'il souloit familièrement exercer en la terre. Ils ne tiennent que de luy seul leur sceptre & leur courōne, sans aucune subiection à quelque autre puissance que ce soit, spirituelle ou temporelle.

Et en cela ie ne veux point toucher au fait de leur conscience, qui les oblige comme les autres, à rechercher en grande humilité parmi les hommes, ceux qui sont preposez pour eternal remede au salut d'un chacun: puis que le createur leur a cōmis la puissance certaine, de delier les nœuds & liens du peché.

Le fondement posé, comme tres solidement assis sur la parole de Dieu, & sur les as-



seurez exemples des anciens Prophetes, Sacrificateurs, Prestres, & mesmes des Apostres, premiers Papes, Docteurs del'Eglise, & plus gens de bien : Que les Roys sont les viuantes images de Dieu auxquels l'autorité est substituee sur leurs subjects, sans estre tenus directement ou indirectement d'en rendre compte à personne qu'à luy seul : il ne reste plus qu'à examiner en qui reside la Majesté Royale, iusques à quoy se peuuent estēdre les bornes de cete plenitude de puissance, à qui en appartient la cognoissance de l'excez, quand il y en a, & comment Dieu en reprime les fautes.

La Majesté des Roys, selon qu'elle a esté infuse de la bōté de Dieu en la personne d'un homme, selon les droicts qu'il a baillez à cet homme de sur les autres, selon aussi l'usage ordinaire de l'humble obeyssance qui a esté renduë à ce premier Roy, est tellemēt inherente en sa personne, qu'elle ne peut en estre diuisee ou communiquee à autre, sans priuation, ou grande alteration de sa personne ou de sa qualité.

Quant à la diuision, elle en est impossible, attendu que la Royauté est vne Monarchie qui consiste en vnté du tout indiuisible. Ce que les Gouverneurs de Samarie, siege prin-

cipal du Royaume d'Israël recogneurent en voullans executer le commandement de Iehu leur nouveau Roy, qui leur mandoit de s'en essire vn d'entre les seprante enfans qu'ils auoient de la lignee d'Achab. Car recognoissans que Iehu leur auoit esté ordonné Roy par la constitution de Dieu, ils luy respondirent estre chose impossible d'auoir deux Roys. C'est aussi ce que nostre Sauueur a prononcé de sa bouche, que tout Royaume diuisé fera desolé.

Et la cōmunication, elle ne peut estre que quād le Prince, poussé de consideratiōs particulieres, à prendre cōseil de ceux qu'il estime ses plus affectionnez ou plus capables, de luy dōner soulagemēt au grand fais du gouuernail de sō Empire, leur met en main l'autorité necessaire pour se faire obeir. Mais cela est seulement vne descharge de peine, & nō pas vne trāsmissiō de majesté qui ne peut sortir de la personne sacree de celuy qui l'a receuē d'enhault, par vne grace particuliere dont l'Ecriture sainte nous represente la voye qui doit estre suiuite, cōme flamboyante lumiere de toute verité en l'exemple de Dauid, lequel combien qu'il fust du viuant de Saül ordonné Roy sur le peuple de Dieu, si est - ce qu'il recogneut incessamment sa

Majesté sacree si estroictemēt inherente en sa personne, que non seulement il fuit tousiours par les montaignes & les cauernes la fureur de sō Prince sans aucun esprit de resistance: Mais aussi il fit punir de mort celuy qui l'accusa d'auoir mis la main sur luy, encore qu'il dist l'auoir fait par son cōmandement.

On ne peut pas dire que Bersabee, bien qu'elle fust femme de Roy & mere du Roy, se soit voulu approprier la Majesté Royale par attribution ou participation, puis que donnant exemple à tous les subiects de son fils, elle commença sa premiere requeste par adoration le visage en terre.

C'est de ces exemples saints que ie veux prendre la preuue de mon dire, & non pas des ambitieuses entreprises de ceux qui abusans des incapacitez des Roys, ont voulu sous leurs noms & leur autorité Royale, vsfer de toutes tyrannies sur les peuples, dont sont aussi suruenus tant de souleuemens & desobeïssances.

Ce n'est pas que j'ignore que nos Roys n'ayent souuent fait coronner leurs enfans comme associez à leur gouuernement, à l'exemple des Antonius Empereurs, & autres successeurs de l'Empire. Mais ces coronnemens estoient plustost des precautions tres-



prudemmet inuentees pour empescher par telles designations les tumultes frequents qui arriuent à la mort de ces Princes, que pour transferer leurs sceptres, ny la Majesté qu'ils reseruoient tousiours en leurs personnes.

Combien aussi que le crime de leze Majesté se cōmist contre ces designez Empereurs ou Roys ; il ne faut point penser que ce fust directement pour le respect de leur propre personne, mais pour la consideration seule du Prince legitime: tout ainsi qu'il peut estre commis contre les personnes des femmes & enfans de nos Roys, pour le seul respect de leurs majestez sacrees, à qui ils appartiennent de si pres, qu'ils sont tenus par les Loix diuines & humaines (quant à la chair) vne mesme personne.

Ainsi est-il dit dedans l'Escripture, qu'il faut obeyraux Roys pour la dignité de leur excellence, & à leurs ministres & magistrats, parce qu'ils sont enuoyez pour la vengeance des crimes. Toutefois le crime de leze-Majesté ne regarde ces Minstres qu'en certains cas, où la Majesté du Roy se trouueroit lezee, par quelque reuolte publique ou signalee desobeïssance, qui regarderoit directement sa personne & autorité.

Mais la question qui se trouue en nos iours  
si sou-



si souvent agitée entre les propres subiects, pour s'asseurer au vray de la puissance du Prince: me fait représenter que dedans l'Ecriture y en a deux especes de distribution. La premiere est celle de laquelle Dieu a voulu obliger les peuples d'obeïr à leurs Roys. Et l'autre est celle qu'il a commise aux Roys, comme les guides de raison pour leur commander & s'en servir en toute douceur, iustice, & amitié, sans cruauté, sans tyrannie.

Cete premiere espece a esté ordonnée avec vn droit représenté au Peuple par le Prophete. Vn droit & dis-je annoncé, que les Roys establis sur eux pourrôt prendre leurs enfans pour s'en servir à tous vïages, s'approprier de leurs heritages, & s'attribuer la dixme de tous leurs reuenus.

Mais bien que les Roys en puissent vser sur leurs peuples sans iuste cōtredit: ce droit neantmoins est selon Dieu, plustost vne representation faite au peuple, des iniques volontez, appetits desordōnez, & passions humaines, qui possèdent les Roys au euglez de leur toute-puissance, qu'un establissement de l'autorité de Dieu; lequel autant bon & misericordieux que Iuste, n'a point mis le glaive en la main de ses Oints pour en poursuivre l'innocent. Et toutefois ceste loy est

escrite, pour enseigner les peuples, que quād les Roys viendroiēt aux excessiues rigueurs de toutes iniustices. Il n'est pourtant permis d'y resister que par humbles prieres, & auoir recours à Dieu, iuste vengeur de toutes les iniures. Lequel no<sup>a</sup> a mōstré par le miroir de son obeissance, qu'on ne peut opposer à l'iniuste vouloir des Majestez des Roys, que la resolutiō du glorieux martyre, & non l'effert d'aucune resistance. Ce qui appert tres-exēplairemēt par l'hūble obeyssance de ce dernier Cinquantenier enuoyé par Ochosias à Elye le Prophete: lequel biē qu'il cogneust par la mort des deux autres, la fin certaine de sa vie: il part & obeyt sans y rien contredire.

Mais la seconde espece a bien autre vilage: Quand Dieu par des lineaments de sa face irritée, & la terrible voix de ses rigoureuses menaces, dit aux Roys qu'il trāsferera leurs sceptres de leur famille en vne autre, à cause de l'iniustice. Quand des cuisans effects de ses saints iugemens, il fait venir les Roys (mais bien souuēt trop tard) au repentir de leurs iniques commandemens & insupportables tyrannies. Il ne leur suffit pas de luy dire que leurs Conseillers en ont esté d'aduuis. Mais leurs inhumanitez opiniastrs iniustices & mauuais traiçtemēs de leurs sujet

sont sans mercy punis, de leur ruïne totale.

Roboam petit fils de ce bõ Roy David, me vient le premier pour exemple, lequel en vn moment perdit les cinq parts de son Royau-  
me, pour n'auoir pas voulu receuoir les iu-  
stes remonstrances de ses subiects, & croire  
les legitimes Conseillers de sõ Estat: Et pour  
auoir dõné creance aux violens conseils des  
nouueaux fauorits qui le portoiët à la foule  
du peuple, & continuation des subides.

Ieroboam, auquel par grace signalee Dieu  
auoit concedé les cinq parts de ce puissant  
Royaume, offensa le Seigneur, & pource, fut  
son sceptre arraché à son fils Nadab, par le  
fort Baasa l'vn de ses Capitaines, qui le tua  
& s'empara de son Empire. Et pour les mes-  
mes fautes, il fut encore enuahy sur Ela fils  
de ce Baasa, par l'vn de ses seruiteurs qui luy  
osta la vie. Au lieu duquel fut cõstitué Roy  
Amry, Prince de sa milice, pere d'Achab. Le-  
quel s'estant, à la suscitation de la Royne Ie-  
sabel sa femme, emparé de la vigne de Na-  
bot l'vn de ses pauvres sujets, qu'elle fit mou-  
rir par faux tesmoignage, furent, luy, cete  
cruelle & toute leur race, condamnez du Sei-  
gneur, à perdre la couronne & la vie: & leurs  
corps ordonnez la pasture des chiens ou des  
oyseaux.



Cet exemple est d'autant plus à graver dedans la memoire des Roys : que combien que Dieu n'ayt donné aucune audience à leurs subjets s'escrîas de leurs impitoyables rigueurs : Il a ietté les yeux sur ce pauvre affligé, & vangé l'iniuste inuasion de son heritage, par la ruine vniuerselle de la famille de son maistre: qui eust esté luy mesme mangé des chiens & priué de son Royaume, si ne se fust conuerty au Seigneur, & par son humilité obtenu la continuatiō de sa couronne à tous ses deux enfans. Lesquels neantmoins poursuiuās les malheureuses traces de la desobeyssance & impieté des Roys d'Israël, virent la fin tragique, de leurs iniustes tyrannies. Le premier finissant en langueur & en cris, sa miserable vie : & l'autre perissant par la fureur des armes d'un de ses seruiteurs, constitué du grand Dieu pour regner en sa place. Et pour donner terreur à vn chacun des Roys, par l'exemple funeste du demembrement prodigieux du corps de cete Royne, si soudainement fait par les chiens de la ville, qu'à peine s'en trouua r'il seulement vne piece, pour estre aux successeurs vn signal à iamais du diuin iugement de son inhumanité, venefice & paillardises, tres sales causes de sa malheureuse fin.

Il se trouue plusieurs tres-eminentes marques de la diuine iustice sur les Roys d'Israël que ie ne rapporteray, pour venir à l'exemple de l'extreme misere du Roy Sedechias, emmené prisonnier avec tous les siens en la grād' Babilone: lequel finissant les dernieres libertez que les Roys se donnoient en Hierusalem, de conuertir la puissance de Dieu en ingratitude, inhumanitez, & tyrannies sur les peuples, vit en vn coup finir les Roys & le Royaume.

On pourroit apporter les tristes accidents des morts inopinées de plusieurs grāds Princes Chrestiens. Mais les causes premieres en estant incogneuës, & par la malice des hommes, subiectes à diuerses interpretations: Ie me contentray de fonder l'autorité des Roys, sur la constitutiō diuine de l'Escriture sainte, solide fondemēt de toutes les puissances souueraines. Car c'est dās ce bassin yraye source de la volonté du grand maistre, qu'il faut puiser le sens des raisons de tout bien.

Par là on recognoist que Dieu ayant resigné aux Roys cete puissance supresme qu'il souloit icy bas exercer sur ses peuples, par la communication des Prophetes. Et asseruy les subiets à rendre parfaite obeissance à leurs Princes, & sans aucune demeure ou

resistance. Il desire que les Roys les traitent & conduisent en toute bonté, clemence, & iustice: & comme succedans à sa place, qu'ils s'efforcent aussi d'imiter la perfection des graces qu'il a mises aux hommes choisis de luy, pour cōmander aux autres. Il les a nommez Dieux, pour les obliger d'auantage à atteindre aux vertus diuines, desquelles ils doiuent vser à la conduite d'un si grand nombre d'ames soubmises en leur pouuoir.

Aussi ne seroit-il à croire que ce grād Dieu tout bon, tout iuste, & tout clement, eust mis entre les mains des Roys ce grand pouuoir, ce glāue de Iustice, pour en frapper l'innocent: Et par humeurs deraisonnables en destruire ce, dōt il nous rend tāt de vrays tesmoignages d'en desirer la conseruation, sans laquelle les Roys ne seroient que personnes priuees.

Il ne veut point aussi que les peuples mesurent l'inegalité de leur estre avec les Majestez sacrees des Roys, viuantes images de sa diuinité, par aucunes raisons de puissances humaines, de courir à reuoltes ou desobeissance. Mais il retient à soy le fort bras de vengeance, par lequel il punit quand il luy plaist les grands, en temps & en saison: & bien souuent par merueilleux exēples, ne delaisant



aux subjects aucunes armes cōtre leurs Princes, que les humbles remonstrances : & en extremité, les pleurs & le martyre.

C'est pourquoy Dieu constituât les Roys, ne leur a donné aucune exemption ou priuilege contre la loy de ses cōmandemens (qui est establie long temps auant leur constitution) afin que se recognoissans ses patures creatures, comme les autres hommes, ils en estimēt plus, la grace de commander à tous & n'obeyr à personne.

Il faut donc rapporter pour fidelle exemplaire de l'autorité des Roys, celle qui a esté ordonnee de Dieu : & dont la digne conduite luy estant agreable, il en a par sa bouche publié hautement le parfait tesmoignage aux actions de Dauid, Ezechias, & Iosias, qu'il a dit estre Roys, regnans selō son cœur, fuyans les abominations des autres, & constamment addonnez à executer ses cōmandemens, de l'aymer de tout leur cœur, de toute leur ame, & leur prochain, comme leurs propres personnes. Ils auoient vn soin fort exact du cult & seruice de Dieu, & d'vne curieuse sollicitude, mettoiet ordre que les deniers du Temple fussent par leurs Ministres & par les grāds Prestres, soigneusement employez à l'entretienement d'iceluy. Et sine

laissoient pas de faire iouïr leurs subjets (de ce qui leur appartenoit) en paix & leureté, sans iniuste desir d'exiger sur persône, ce qui leur estoit d'effendu par la loy du Seigneur.

A l'imitation de ces bons Roys, dont les actions de iustice ont publié la renommee dans le plus hault des Cieux, & par toute la terre. Nos Roys, par actions pareilles, s'estans tres-iustement acquis le tiltre de tres-Chrestiens, ont pris pour marque plus Auguste de leur perseuerance, vne deuise obligeant à iamais leurs actions, à satisfaire à Dieu & aux subiets. Qui est cet illustre tableau representant leur Coronne soustenuë de deux fermes piliers de Picté & de Iustice.

Ces deux colonnes sont les fermes fondemens ordonnez du grand Dieu, & sur lesquels les plus grands de nos Roys ont basti la gloire de leur Empire, dont le nombre tres-grād se trouuera excéder tous ceux que les histoires saintes & prophanes raportent de tout l'Vniuers.

Clouis & Dagobert ont reduit par leurs traualx & saintes exemples de bien faire, la plus part de la France, en la Religion Chrestienne. Pepin & le bon S<sup>r</sup> Charlemagne, ont augmenté la foy, & porté l'estendart de la Croix salutaire, aux extremitez de l'Europe.

Et que

Et que n'ont point fait Robert, Philippe I. Loys le Gros, Philippe Auguste, Loys s<sup>o</sup> fils, S. Loys, Philippe le Hardy, Philippe le Bel, & tant d'autres suiuan de cete bonne Race, ayans extirpé les Heretiques Albigeois, vaincu les Sarrafins en Affrique & en Espagne, ont basti, fondé, & dotté tant de superbes Temples, tant de Chapitres, Colleges, belles Abbayes, & tant de bons Hospitaux, eternels tesmoignages de leur pieté enuers Dieu ce grand Roy, duquel ils ont tousiours si humblement recogneu leur puissance Royale?

De cete Pieté, la Iustice compagne approchant son pillier, a, specialement dans la dernière race, fait immortaliser les glorieux n<sup>o</sup>s de nos Roys par leurs saintes Ordonnances, surpassans de bien loing celles des Grecs & des Romains. Quand d'une filiale pieté enuers Dieu, & paternelle amour enuers leurs sujets, ils ont du tout banny de leurs presences Royales, toutes passions humaines, affectiōs particulieres, & desirs de fauoriser. Pour deffendre l'innocēt, l'Eglise, la veufue l'Orphelin, le pauvre & miserable, contre l'authorité des plus puissans, sans s'explorer aux prieres des calamiteux, ny s'aigrir contre ceux que l'on disoit meschans.



Quand en chassant bien loing les occasiōs malignes, d'asseruir leurs iustes intentions aux mouuements impetueux de l'imbecillité naturelle, ils se font d'une liberalité volontaire, despouillez de l'autorité souveraine (de rendre la iustice à leurs peuples) pour en charger leurs propres subjets enuers Dieu & les hommes.

Et quand eux mesmes, par pieuses considerations d'estre subiects à la Iustice diuine, se sont soubmis de leurs volontez, de leurs biens, & de leurs droits, aux sages iugemens des Officiers par eux preposez.

Bref, l'experience des plus deplorables desordres, n'a point inuenté vn seul moyen d'affermir tant soit peu les forces de leur Iustice, que par vn courageux essay ils ne l'ayēt mis en vſage, voire au rabais de leur toute puissance, tant ils ont adoré cete belle vertu.

Les Roys de la seconde race, voyāns que le mespris des Arrests prononcez de la bouche de leurs predecesseurs, auoit esté non seulement la diminution, mais la perte totale de leur autorité; establirent vn conseil composé des plus grands du Royaume; en pouuoir, en credit, & en bonne renommee qu'ils appellerent leur Parlement. Par l'autorité duquel, & distributiō de leur iustice

tant aux occurréces de l'Estat, & de la guerre, que des affaires particulieres, ils continrent long temps les subjects, sous la douce assurance de leur bonne equité.

Mais ceux de la derniere Tige, cōme plus familieremēt aymez de Dieu, & par inspiration celeste, se tenans aduertys de son iuste courroux, par les fleaux de l'heresie suruenū en quelques parts du Royaume, & des guerres ciuiles, dont plusieurs Prouinces estoient affligées, eurent recours pour eternal remede à toutes diuisions, & pour assurance perpetuelle de leur Empire, à cete vertu diuine. Par laquelle les Roys se peuuent acquerir l'amour de Dieu, & la bien-vueillance des peuples, plus seures garnisons qu'ils puissent souhaitter.

Ils se rendirent plus curieusement affectionnez de donner lustre à cete Auguste Cour, qu'ils opposoient sans encourir enuie aux iniustes entreprises de ceux qui non cōtens des bornes de leur pouuoir s'efforçoiet de dominer la terre. Et par la seuerité de ses iugemens, ils estouffoient dès la naissance, toutes couleurs du bien public, que l'on vouloit donner aux mauuaises menees.

Sainct Loys s'en seruit à propos. Et Philippes le Bel ce tant Auguste Prince, par vne



prudence inestimable, rendit cet illustre Senat plus ordinaire, en l'assurant par quatre seances certaines.

Plusieurs ont estimé, que comme par le bruit de sa bonne renommee, il attiroit les differens des plus grâds Princes de la Chrestienté. Ainsi qu'il fut iuge certain du different de la Loy Salique entre le Roy Edoüart 3. d'Angleterre, & Philippe de Vallois, que l'on dit l'auoir (depuis qu'il fut iugé Roy) rendu sedentaire, & continuellement exerçant la iustice souueraine des Roys, en cete ville de Paris.

Autres ont voulu dire, que le Roy Charles VI. pour ramener entièrement à soy les affections de ses subjets diuisez en diuerses factions, trouua ce bon moyen du continuel exercice de sa Iustice souueraine en sa ville de Paris, & entre les mains des plus renommez.

Il y a trois formes d'Estats, seuls trouuez bons pour gouverner les peuples, qui sont, la Monarchie ou conduite d'un seul, l'Aristocratie, ou gouvernement d'un nombre certain des plus estimez: Et la Democratie qui est l'Estat populaire. Mais l'Ecriture sainte, les histoires de toutes les nations & les iugemens des plus grands Politiques,



font voir à l'œil, que l'inconstance & dureté des hommes, les peut corrompre en peu de temps.

Carpour le premier, n'y ayant rien qui soit parfait en la nature, il est certain que quand le plein pouuoir demeure resident au vouloir d'un seul homme, ses volontez sont aysement portees aux appetits dereglez de la sensualité du tout contraire à la raison, qui par ses reigles, luy acquiert seule, les legitimes forces du commandement absolu.

Quand aussi le gouuernail des affaires communes, est affecté à quelque nombre esleu des plus estimez del'Estat: bien que pour les premieres annees on y recognoisse le mouuement d'une douce armonie: Si est-ce qu'à la premiere discorde des Conseils, les diuisions se forment secretemēt dedans les ames ambitieuses, qui peu à peu se faisans des partisans, embrassent l'occasion d'une querelle pour se rendre les maistres, & conuertir leur Estat en pure Monarchie.

Et quand la puissance supreme est retenüe dans les tumultes d'un peuple inexperimenté, il aduiēt en peu de iours, que par les cours indiscrets de ceste rude populace, a toutes choses contraires à sa propre vtilité: les plus vertueuses ames cherchans vne seu-

le retraicte, contre les flots destempestueux orages qui les vont menassant de leur proche naufrage, ser'assemblent par familles, & en fin les factions s'estans toutes formees, les plus forts se seruās del'occasion premiere, se rendent chefs de part, & puis changent l'Estat, & s'en font Roys & Monarques. Ou biē en tous cestrois desordres, le desespoir des peuples les dispose la proye de quelque fort estrangier.

Tellement qu'il n'est seur d'auoir sa confiance à l'vn de ces Estats, dont l'establissement est de si fragile nature.

C'est pourquoy l'experience mere de tous secrets, faisoit prudemment remarquer à l'vn des plus Sages mondains des siecles passez: Qu'aucunes Seigneuries n'auoient iamais este de bien longue duree, sinon celles, qui composees d'une forme meslee de cestrois sortes de gouuernement, auoient conduit par telle cōmunication les loix de leur Empire. Allegans pour exemples, l'ancienne Monarchie d'Angleterre, dont la puissance absoluē des Roys, soubmise au iugement des trois Estats du Royaume, qu'ils appellent Parlement, est pleinement reuersee (quand ce Conseil y a passé.)

La Seigneurie de Venise, dont le pouuoir

estant entre les mains d'un nombre de Seigneurs, n'a pris establisement & force de sa duree, que par le rapport de ces circonferences, au point principal de leur Duc, dont le nom est vne forme qui donne quelque estre plus Auguste à leur gouvernement, fort souvent fomenté du consentement d'un grand nombre.

Et laissant à part la consideration des autres Estats, pour venir à nostre France, principale figure de ceste demonstratiō. Ce personnage rapporte le bon heur de sa longue Monarchie, au seul maintien de ce grand Parlement, où la Majesté des Roys est adoree, & toutefois l'essence de leurs volontez absolues, tousiours reduitte ( par ce Senat composé des trois Ordres ) au sens de la raison: Par l'opinion de laquelle les subjects reçoient patiemment, comme loy de Iustice, ce qui y est arresté.

C'est en ce Parlement, que pleinement reside l'autorité des Roys. C'est luy, qui est le vray depositaire de leur Iustice souueraine dont Dieu les a chargez. C'est celuy, qui preserve leurs Majestez sacrees, des plus rudes attaintes. C'est luy, qui par l'effroy de ses saints iugemens, espouente les plus audacieux rebelles. Qui dissipe en vn moment,



les factions euidentes ou secrettes de tous  
 conspirateurs : qui contient enserrez aux  
 bornes du debvoir , les plus ambitieux. Et  
 celuy qui donnant terreur aux plus meschās  
 par la punitiō de leurs crimes, console en vn  
 instant les bons, d'asseurance de paix en leurs  
 biens, leurs honneurs, & leurs familles. C'est  
 celuy que S. Loys consulta pour deffendre  
 ses loix des vsurpatiōs estrangeres. C'est ce-  
 luy, qui secondant Philippe le Bel son legiti-  
 me Prince, condamna les iniustes entrepri-  
 ses de Boniface VIII. C'est luy, qui fortifiant  
 la Colonne fondamentale de la Loy Sali-  
 que, dechassa les Anglois de leurs pretentiōs  
 & maintint la Couronne de France, en la mai-  
 sō Royale de Philippe de Vallois. C'est luy,  
 qui empescha l'iniuste exheredatiō du Roy  
 Charles VII. C'est luy, que le Roy Loys XI.  
 promit de maintenir en liberte de conscien-  
 ce, pour recognoissance de sa fidelite. C'est  
 celuy , qui resistant aux iniustes rigueurs de  
 la victoire de l'Empereur Charles V. retira à  
 propos le grand Roy François de son mau-  
 uais mesnage, sauuant le Duché de Bour-  
 gogne, & conseruant aux Roys la souue-  
 raineté de Flandres. C'est celuy, qui au mi-  
 lieu des feux de nos premieres guerres ciui-  
 les, du temps du Roy Charles IX. conserua  
 l'heu-

l'heureuse race de nos Princes de Bourbon.  
 Et qui par les chemins de sa iustice reglee,  
 fit trouuer l'innocence de ce grand Prince  
 de Condé, ja demy terracé par les calom-  
 nieuses procedures des ennemis du sang  
 Royal. C'est luy, qui s'opposant aux factions  
 de la ligue, fut iniurieusement trainé dedās  
 la Bastille, en haine de son Roy. C'est luy,  
 qui au plus grand desespoir de la France, re-  
 sista à la Bulle de Gregoire XIV. qui priuoit  
 nostre Roy de sa belle Corone. C'est luy, qui  
 authorise l'autorité des Roys. C'est lui, qui  
 sous le joug de cete furieuse ligue, au mi-  
 lieu des cousteaux, du sang, de tant de meur-  
 tres, refusa pour son Roy l'Espagnol, ja vain-  
 queur de son libre pouuoir. C'est luy, qui par  
 l'effort de ses iustes remonstrances, a fait par  
 plusieurs fois changer l'ire des Roys en des-  
 plaisans regrets. Et qui par les douceurs de  
 son humble patience, leur a fait reuocquer  
 leurs Edicts & leurs Loix. Et faire la Iustice  
 des mauuais Conseillers, qui donnans de  
 flateuses apparéces aux choses iniustes, leur  
 faisoient perdre l'amour de Dieu & l'affec-  
 tion de leurs Peuples. C'est luy, qui au grād  
 besoin de cet Estat, en accoisant le trouble,  
 establit les régens & les fait obeir. Bref, c'est  
 luy qui suporte l'enuie de la rigueur des loix,



quand leurs Princes forcez concedent chose iniuste. Et qui remettât toutes choses aux termes de la raison, fait obeir les Roys, receuoir leurs Edicts, satisfaire aux deuoirs, & les rend bien aymez, sans plainte & sans tumulte.

Saint Paul dit, que les moyens de paruenir à la gloire sont la Foy, l'Esperance & la Charité. Que par la foy on peut guarir les malades, chasser les Demōs, ressusciter les morts, & faire toutes choses admirables. Mais que cela n'est rien à celuy qui n'a la Charité.

Qu'est-ce que Charité, si ce n'est la Iustice, par laquelle les Roys font seruir Dieu, & rendre à eux & à leurs subjets ce qui leur appartient? Qu'est-ce qui fait que tāt de corps robustes, pleyent deslous le ioug du vouloir d'un seul homme, voire bien d'un enfant? Qu'est-ce qui nous cōduit au respect de luy seul, plutost que d'un plus vieil, plus fort, plus sage, ou plus instruit? sinon les grands effets de la Iustice, donnee pour tres-sage conduite de tout gouuernement.

C'est ce qui fait les Roys, ce qui les establit. C'est ce qui les retient en la grace de Dieu. C'est ce qui les maintient. Qui les fait reconnoistre. Qui les fait adorer. Qui les fait estre Dieux, & qui d'une main equitable, les



fait donner les recompenses, à ceux qui par amour sont portez à bien faire: Et ordonner les peines aux malfaiteurs sans aucun choix d'amitié, ou de haine?

C'est donc vraiment cete iustice, qui se peut appeller l'autorité des Roys, qui ne sçait point flatter soubse espoir de faueurs, & ne fleschit iamais pour crainte de menaces.

Nos Roys sont icy bas les Lieutenans de Dieu, doüez de vertus suffisantes, pour bien regner, & s'acquiescer l'affection des peuples.

Dieu qui nous a donné la libre volõté, l'acquiert par sa bõté, sa clemẽce, & Iustice. Il est craint des meschãs par la rigueur des peines. Il est aymé des bons, crainte de luy desplaire. Il ne veut point de nous vne amitié forcée.

Si les Roys, qui sont Dieux, veulent par ces vertus, de bien viure & bien faire obliger leurs subjects à telle bien-vueillance; ils cõmanderont à leur plaisir. Ils seront obeys à leur desir. Et d'une autorité absoluë, tireront d'un chacun, de franche volonté, le service à eux deub, & l'humble obeïssance: cõble parfait, de la suprême autorité.

F I N.

Sup  
not  
cataloged